

## UVOD

Logistika i upravljanje lancima snabdijevanja su osnovne teme razvijenih zemalja svijeta. Logistički sistemi i procesi proučavanja, pakovanja, pretovara, skladištenja, transporta i upravljanja zalihama su predmet stalnog usavršavanja. Prisustvo logistike je svugdje vidljivo, ona je prisutna u industriji, u trgovini, u saobraćaju, u vojsci i u dosta drugih grana privrede. Logistika se bavi planiranjem, organizacijom, kontrolom i realizacijom tokova robe od mjesta proizvodnje do mjesta prodaje ( od mjesta nastanka do mjesta potrošnje). Njen osnovni cilj je da zadovolji zahtjeve tržišta uz minimalne investicije i troškove. Sve je veća potreba u svijetu za posrednikom između prodavca i krajnjeg korisnika, a upravo to je logistička kompanija. Logističkih kompanija je sve više kako u svijetu, tako i kod nas. Za krajnjeg korisnika je to dobra vijest iz razloga što vlada velika konkurentnost između njih i oni se trude svakom klijentu da ponude što bolje uslove, da bi se korisnik usluge odlučio baš za njih. Osnovni zadaci logistike su skraćanje vremena i smanjenje troškova u procesu ostvarivanja ciljeva nekog preduzeća. Pravi značaj vremena shvaćen je tek pojavom logistike. Vrijeme se smatra petim činiocem proizvodnje i ono svakom stoji na raspolaganju besplatno. Njegovo korištenje stvara direktne i indirektne mjerljive ekonomske efekte. Zadatak funkcije logistike je upravo upravljanje vremenom i njegovo najbolje iskorištavanje i vrijeme ima izuzetan značaj u poslovanju nekog preduzeća. Kada već pričamo o logistici morali bi znati otkuda potiče taj naziv i šta on ustvari znači. Ima više teorija nastanka riječi logistika. Prva teorija : Korijen riječi logistika potiče od grčke riječi „logos“ što znači znanje o principima i oblicima pravilnog mišljenja i prosuđivanja. Druga teorija : Korijen riječi logistika „logis“ ima značenje štab na francuskom, u najširem značenju predstavlja nabavku, održavanje, zamjenu i distribuciju materijala i ljudi. Treća teorija : Korijen riječi logistika „logistic“ na engleskom jeziku ima značenje nauka o pozadinskoj službi. U ovom diplomskom radu će se obrađivati jedna veoma interesantna i popularna tema. U njemu će najviše biti riječi o svjetskim logističkim kompanijama i njihovim načinima rada u prevozu tj. transportu robe kontejnerima.